

蘇魏公文集

萬靈署

蘇魏公文集卷五十

宋太子太保右僕射同中書門下平章事司空魏國公蘇頌撰

逢年

高孫萬靈重刻

啟

耀庭

濠州到任謝二府

右某蒙恩差知前件州已到任上訖者非才尹劇誠不厭於人言有罪出麾復得臨於民政去都不遠便道匪勞初省詔條有慙面目伏念某識無遠大智乏周防誤被宸俞使承府治謂諸僚皆朝廷之選故信任而弗疑以兩造非姦慝之人故寬舍而不問豈意吏曹之乖謬致煩詔獄之推窮無由自明分甘重責荷上恩之含垢原所坐之因人止免一官仍除善郡此蓋某官致君以道用法不私方百度之惟新靡容於曠事或一物之失所每惻於深仁俯矜多難之餘陰有曲成之造迂疎獲譴固宜置散以投閑哀暮貪榮尚爾為貧而竊祿敢忘內省仰答殊私

滄州到任謝二府

右某蒙恩差知前件州已到任上訖者上盟津之符特寬既往之咎假滄海之節

再荷曲成之私逮此布條徒深嚮德伏念某所憑不厚自知甚明智畧不足以適時宜操修非有以過人者冒塵禁近初以妄言而下遷試守劇煩復緣縱舍而連黜每思薄祐絕意榮塗誠宜置散以投閑姑務省非而責已收還印綬已慙天幸之多擢守藩方抑懼人言之噴矧茲邊寄匪用次遷顧敗官不職之餘才非其稱惟振廢起淹之舉恩有所歸此蓋某官心推至公道在博愛賞刑無濫雖賤微皆軫於哀矜故舊不遺在鄙薄尤蒙於假借委之善郡慰彼衰年惟堅匪石之心少答在鈞之賜恩閱千里魂幹九升戀戀之誠云云何及

回運使兵部

右某啟伏審某官露章辭劇劄竹為藩轅使務於真方殿鄉邦於江國主知素厚暫諧卧治之榮士論所歸行聽節趨之寵眷言屬部悵失餘光方深去德之思忽枉摘華之貺國函緡禮拜手迹以彌勤大旆嚴行望車塵而益遠更祈良食少緩遐心回知郡郎中

右某伏念環甸相望徽音坐隔雖嘗寓訊未諭馳情遠承教牘之貽過篤謙撫之意聆風為慰銜德無忘伏惟某官生質渾深材資敏邁本閨臺之積譽副州郡之選能師帥承流已報成於政治朝廷重外方表任於循良願益將頤佇聞咨擢乃

誠所嚮臨啓采勤

賀禮儀待制

右某伏審某官進膺言綽榮踐禁塗辱與交從竊深慶抃伏惟某官耆儒宿望懿行深資逢辰早躋於文科奮藻不離於經術先帝天飛之日眷注已隆邇英畫訪之游登延且久近序徧更於典領同時共歎於淹回黼帷勤求舊之思天闕慶登賢之拜內備顧問雍容持橐之榮入告謨猷旦暮沃心之熟某久睽風晤喜聽咨俞方嬰簿領之勞早闕緘膝之貢敢圖厚眷先貺華賤雖親疎而禮意均本由謙重然貴賤而交情見采荷撫循徒深悚載之懷莫喻傾輸之素

上致政郎中

右某伏念攫郡鈴之紛擾少曠馳郵瞻燕几之優閑常深企德緬想興居之暇益臻輔養之和伏惟某官樂道希夷處躬溫厚早遂冥鴻之志高辭振鷺之羣歸里巷以安躬推先士望實邱園而養素用固天倪漸屆熙春尚遙省晤倍祈保攝式副傾翹

回提舉著作

右某啟近因首歲嘗寓慶緘尚未徹於省觀忽先紆於翰尺曲敦禮範備見愛忘

別在州封方承使旨惟奉循之恐怠賴寬假之已多敢冀謙撫過垂眷獎拜手筆
八行之貺愧荷殊深限淮山千里之遙披承永日更期珍護別佇寵遷欽企之誠
一二奚究

回恩州知府皇城

右某啟近者之藩假道獲款於賓闕折俎飛觴復陪於燕衍屬迫官期之近不終
賦舊之歡去德未幾合符伊始託喜鄰之庇方企於風期裁古史之書先承於惠
好且審侍鈴之多暇允臻泰宇之嘉祥宣布中和已協惟良之譽登延近密行膺
不次之榮適屆春和益綏冲履其於感系未易殫陳

回冀州知府左藏

右某啟自承榮領使權幸依河潤沈迷鮮暇未遑竿牘之儀謙假過隆首辱賤騰
之貺仰循重意載戰戰丹悰伏惟某官忠諒承家詩書縉學稔武名於朝衆藹政譽
於邊藩鎮撫外夷方賴折衝之畫先華近著行膺簡在之恩尚阻晤言倍祈遵養
傾依之素鑒寐不忘

回知縣太博謝改官

右某竊承某官上課天官拜恩綸制榮進曲臺之秩益開近著之班夙忝與游欣

聞新渥猥辱書牒之貺曲形謙辭之隆銜戢於中諭言靡託別以某官才名夙茂
風譽兼優百里之治絃歌久彰善治三年而庇績用已被榮褒佇別對於寵陞乃
奮揚於素蘊未期占岳姑螯禱虔

賀新恩先輩

右某啟伏以右文興治盛德撫辰廣求天下之英皆與穀中之選詔書一下士類
四臻承平百年用此數路刈薪之效而得乎翹楚育材之久而見乎菁莪必須異
能以備優等伏惟先輩學漸聖域文舒國華宴游雋造之林久待弓旌之聘飄然
麗賦嘗親乙夜之觀赫爾榮名高視東堂之集方聆駿舉俄沐華緘味詞意之稠
重增鄙懷之企悚

回舍人

右某伏念跡寄近藩坐企闥臺之彥書傳便驛欣聆金玉之音荷恩眷之稠重慰
羈懷之勞吝恭審順綏福履保固天倪伏以某官道探古先學臻典則資嘉猷而
悟主發素業以濟時言成絲綸方演筆端之妙禮有沿襲更資綿叢之精朝倚碩
儒日期柄用式臨庚伏止遠賓趨敢冀上為廟朝精調寢饋

回致政龍圖

右某啟竊審某官通奏中宸請辭近著援大夫傳政之禮慕至人佚老之談矧久踐於禁塗加累藩於戎翰聲猷茂著體力方強遽懷止足之心深伏沖高之度猥承華幅曲謝堅誠雖景企以良勤載銘銜而弗已乃情所嚮臨啟甯周

回杭州知府待制

右某伏審某官出殿名邦升華內閣暫輟中臺之貳往專方面之權地據上游控全吳之都會兵鈴一道制百粵之襟喉允屬高才式當重寄敢意撫謙之德曲敦求舊之情竿牘為儀獲覩春華之麗藻風期采駕更欣寒柏之後凋感扞兼深敷陳曷喻

任左丞回外任兩制

右某啟比者叨被恩綸擢升省轄才非其稱愧積於中伏念某生質無奇福基甚薄流離多難出入四朝會府複門已玷一時之選遠塗暮景本期三徑之歸詎意僉諧更加獎擢比蓋某官素推公議每借味言方慙誤寵之優繼辱榮函之貺仰銜眷惠曷勝名言

任右僕射謝前宰相

右某啟比者欽膺朝制擢預宰司惟幾政之倚平豈瑣材之足任辭恩弗獲充位

為慙伏念某識昧大方器非遠用荷四朝之樂育逮二聖之春知進參管轄之謨殊乏涓埃之補方再退藏於閒燕敢期冒寵於鈞樞不愆不忘素乏胡公之善非勳非舊但懷文本之憂此蓋某官表式斯文衡平多士曲記與游之舊陰推引類之私施及孤愚越叨圖任望平津之東閣莫遂披承覽蕭相之前規徒深景仰方修竿牘遽枉緘騰祇承惠好之思倍深感銘之素

任右僕射回外任兩制

右某啟比者冒恩庭制登職宰鈞重惟哀毫之餘猥被咨俞之寵位槐匪稱據蒞為憂某官義篤相先交隆久敬樂贊言綸之出首貽占牘之儀摛藻為春情與文而俱緝發函如面感將抃以交深祇服謙撫莫殫言論

乞致仕上二府

右某啟伏念某所賦不厚自知甚明少無過人之才累歷清貫晚叨輔政之仁終致煩言自解去於近司尚冒承於異數假真祠之使領就樂土以家居荷全度於大鈞獲保躬於晚歲優閑過甚疾疹彌加膚革不仁固難勝於冠冕桑榆已暮姑待盡於衡茅輒傾肝鬲之誠仰瀆鈇疏之聽以從散秩歸保餘齡伏望某官推測隱之深仁運代工之洪造入陪坐論特啟俞音倘緣陶冶之私俾遂邱園之逸不

獨退處閒燕幸終老於士鄉庶幾訪尋巫醫稍扶持於病質果諧願望寔出生成
斷嚮之誠夙夕於是

致仕謝二府

右某啟比者拜恩朝綽歸老鄉閭擢孤卿崇貴之官躋舊相退休之秩寵光踰分
感懼交懷伏念某一介儒生四朝榮遇出入將周於五紀黃緣偶玷於三階鼎足
弗強幾覆梅鹽之實施心已拔尚霑雨露之濡久竊燕安寢成沈痼視陰愒日每
驚疲曳之年苟祿養榮自愧婆娑之事屢抗章而告老蒙賜命以曰俞聯禁職於
真游獎其歸志返衡門於京口養此餘齡恩數過優甄成有自此蓋某官代天化
育秉國平均啟沃心而在公進退人而盡禮曲徇孤危之懇免貽始辱之譏敢言
願棄於人間希蹤前哲姑欲待終於牖下歸骨先原荷德不貲馳誠無已

回殿前太尉

右某啟伏審顯膺庭告進職殿嚴推新鎮之節旄視上公之禮秩遠趨嚴召榮拜
異恩竊以某官識洞鑑鈐學敦詩禮世服忠勤之節躬兼儒雅之風入則總親校
於內庭出則抗威校於邊閫勲勞夙著聲誼益隆輟帥府之閑謀肅提禁旅陞將
壇之重寄密衛宸居方慶龍光遽貽華翰欣銘兼至數諭奚殫

回中書侍郎

右某啟比者上閔哀遲詔容退老仰拜遷除之命俯全進退之方企望時賢固慙伯玉之在後重惟恩舊最叨鮑叔之深知已布懇誠具於竿牘豈謂某官情敦雅素義篤始終不忘久要之言薦講平懷之禮尺牘隨天書而並至堂毫與手跡以相輝雖子孺遠權不在自言於長短而孟公隱几率皆有意於親疎姑恨殘骸難勝重貺崢嶸晏歲修遠遙塗無階賓閣之趨但祝生經之衛上符注意下慰具瞻

回殿前太尉

右某啟言念哀遲暮景久辭拱著之榮誕育初辰方切免懷之念豈謂某官敦修契素講敘彝儀白雪長言借華宸於麗句南辰妙相形善祝於餘齡集鑑薰壽華之芳兼篚帛仙巾之飾義全金石豈輒薄之能勝地隔川塗悵披承之攸阻永言佩服姑用傾馳

回中書副閣舍人

右某啟近審榮膺詔檢峻陟詞垣進增近著之光華雅副清哀之簡眷竊以帝王之制煥典冊之文章台閣之規著雷風之號令鋪張治具鼓舞人羣必資博雅之才共贊幾微之務伏惟某官文高體要識洞淵源以昂霄聳壑之姿副絕類離羣

之選紬書史觀夙推良直之風持橐從班益盡論思之效方欣明命遽枉騰音獲
窺破的之辭深歎湧泉之思仰銜謙德深激懦衷

回知府待制

右某啟向審易鎮雄藩升華內閣式表循良之效寔叅侍從之榮賢業有光僉言
惟允某官器能閱博智識淵微踐更要劇之權著見事功之敏囊雖脫穎庖刃發
矧擁節分符出則寄蕃宣於巨屏簪筆持橐入則備顧問於邇聯蓋能兼政事文
學之科是宜居方伯連帥之任將疇治最別副眷求詎意謙撫遠紆華翰欣銘茲
極敷喻奚殫

回校書學士

右某啟近審某官拜命嚴宸校文中秋輟壁水橋門之望躋蓬山藏室之華絳帳
傳經已發韋編之奧青藜坐照正刊蠹簡之訛聊假清途遂階近著竊慶絳綸之
寵遽煩竿牘之儀祇味雄辭深欽高致悵拊塵之未逮徒置袖以無忘感佩之誠
敷陳曷喻

回給事

右某啟伏審自蓬閣之上游升瑣闥之要路淵衷圖舊輿議允諧伏惟某官學繼

聖門譽偕賢世久次師儒之任益推經行之高鳴玉納言入則侍清閑之燕左符半
竹出則宣愷悌之風縈滯有年峻遷特異東台蕃讀之政出令惟嚴西清訪對之謨
沃心無間竊聆成命增慰私懷豈期眷顧之勤先枉賤騰之貺出於謙借姑用銘藏

回奉禮宣德

右某啟近審顯膺明命再擢詞科錄成鉤升選之恩正司馬論賢之目名實既定資
格遂殊矧惟適變之才素擅通論之學考言詢事固嘗超拔於賢闕發策決科已復
攬收於英毅迨茲寵渥竊啟華塗猥煩占牘之儀獲閱栖毫之妙乃誠感并曷喻名言
回秘書學士

右某啟近者某官簡自工心擢居秘府錯新刈楚選於眾而拔其尤舐墨和鉛博
以文而審其是朝惟顯俊時號得人矧繄素履之賢雅著士評之譽一言合契萬
乘改容亟頒芝檢之優恩躋進蘭臺之美職平日育才之地聊刊正於舊文異時
迪哲之功佇鋪張於偉績辱榮辭而見及佩雅眷之不遺感與并并情非言喻

轉宮保謝宰職

右某啟比者祇恩中詔進秩青宮事出甄成敢盈心抱伏念某所憑不厚微幸寔
多少也入朝寢竊器名之重老而謝事尚叨祿秩之優適當時制之期仰屬天飛

之運大賚四海仁恩溥洽於函生敘進百官寵數特加於舊老逢時有慶服寵增榮此蓋某官夙播大鈞曲全晚節邁風雲之亨會被綸綍之優除一品班崇豈耄昏之宜稱三階路隔思占敘以無由佩服恩私漫馳誠素

回廬州知府舍人

右某啟伏審光膺制詔移鎮淮圻復書殿之清資總兵鈴之要地寵榮增煥朋舊相權竊以某官夙富宏才少馳敏譽論經帝學名動公卿之間奮藻詞林職居某近之要三已豈渝於直道九遷甯滯於遠途再陟近班仍藩舊治郭伋之再至所部聊慰兒童望之之雅意本朝豈淹郡吏上知已久峻召非遙士論傳聞方喜俊賢之進用行人遽至遠承賤牘之謙撫自顧衰遲何勝眷記爰歌在候披奉未期冀倍保於寢興庶少符於系詠

回通判都官

右某昨者被命中宸得麾近環側聆時彥方貳政條非徒適求舊之懷兼亦遂依仁之願忽紆華幅過示遜辭荷曩眷之未忘刻丹誠而不已伏惟某官富文敏學博識周才始擢秀於上科累試能於劇務郎官清要久更踐履之榮詔旨寬和叅賴布宣之畫顧慙拙用幸接事聯佇諧親揖之期併抒傾輸之素

蘇魏公文集卷五十一

宋太子太保右僕射同中書門下平章事司空魏國公蘇頌撰

逢年舜畊

裔孫萬靈錫經重栴

碑銘

晉爵耀庭

翰林侍講學士正奉大夫尚書兵部侍郎兼秘書監上柱國江陵郡開國侯
食邑一千三百戶食實封二百戶贈太子太師謚文莊楊公神道碑銘

并序

淳化五年冬十月真宗皇帝以壽王出閣尹開封朝廷慎選府僚輔導明兩於是
驛召鎮安軍節度行軍司馬楊公為左諫議大夫充開封府判官至道元年秋八
月春宮建兼太子左庶子三年三月儲皇踐極由給事中拜工部侍郎充樞密直
學士兼秘書監再遷禮部踰年以衰老求解近職進兵部侍郎未幾特置侍讀學
士秩如內禁公以本官充翰林侍讀學士兼官如故夏侯士嶠邢昺呂文仲實並
命也上日賜會秘閣寵以七言御詩儒學之官一時為盛以公春宮舊僚眷待尤異
每清問訪對從容言天下之事多至移刻造辟之論世莫得而聞也方將圖舊熙功記
善惇史屬邁足盤移告家居靈書銀璫診問旁午仍以御封上藥賜之咸平初郊

不及陪扈特詔賚物如侍祠仍進封江陵郡侯未幾鑾輅北巡公舁疾辭於苑中
上諭以勉進醫藥不久當相見及駐驛大名又以手詔問平安好否三年正月二
十三日車駕還都遽遣中使慰諭後二日以疾不起聞上為軫惻久之特輟視朝
一日贈兵部尚書降內司寶至其第賻錢五十萬帛五百疋又賜祥符縣之北常
村塋地緣葬所須皆出王家錢內侍任文慶實監護其事詔以其壻太丞譙國宋
公臯直集賢院外孫常山公綬為太常寺太祝姪孫偃集並同學究出身益聖主
所以尊賢憫舊推往撫存終始之恩至矣公諱徽之字仲猷胄出華陰著姓漢太
尉震七世孫信安侯嚮之子奢仕晉鬱林太守永嘉南渡徙籍上饒奢之十五世
孫光翼唐上元中為信州刺史以劉展亂江左遣其子建安令宣挈族人歸於閩
因家浦城遂占數建安焉子孫累世以財力擅州里公之曾祖式辟王朝叅謀軍
事未幾辭歸終老於家祖部當唐季盜起率合義徒千餘人保守土境補閩義軍
指揮使累官至本州防禦使考澄生戎馬間獨業文史嘗以策畫干忠懿王王一
見奇之表置幕府俄假緋衣銀魚為本縣令卒官以子貴贈尚書禮部侍郎公禮
部次子也少刻學自立不妄交游邑人江文蔚善詞賦江為能歌詩並延置客館
切靡友善遂與齊名聞潯陽之廬山學舍甚盛因往肄業屬李氏失政不欲仕其

國乃潛服開道達於汴洛贊文公卿間特為賓儀王朴所知王公答書以奇士目之周顯德二年第進士同奏名者十六人世宗命近臣覆實惟公泊李章何儼趙隣幾中選解褐秘書省校書郎集賢校理歷著作佐郎右拾遺實儼薦同修禮樂書時相范質尤器待之國初加朝散大夫出監唐州方城縣商稅值故人奉使廉訪謠俗公見之因言主之應天順人海寓寧一宜崇尚儒術以厚民俗使者還具白其語頗拂上指左降鳳翔府天興令府帥王彥超籍其名待以賓禮蜀平徙嘉州峨眉令開寶初復佐著作劉溫叟任御史中丞十二年屢求解職不許及卒太祖問宰相朝行中誰可繼溫叟者薛居正對曰楊某即溫叟所放進士節行清白亦相類也時雖不果用然朝論自此以舊德處之出知全州太平興國中再轉右補闕代還陞見日太宗顧左右曰朕在藩邸即聞其能詩因盡索公之所著奏御凡數百篇仍別獻謝章其落句云十年流落今何幸叨遇皇王問姓名他日又獻雍熙詞十篇上皆稱善用其韻以和答焉自是聖藻宸章多得別本之賜嘗屬疾上敕醫視之賫錢三十萬皆非常比也歷侍御史庫部員外郎更判刑部南曹同知差遣院賜紫衣金魚太宗留意儒雅日閱羣書詔翰林學士李昉等采前代文章類為十卷號文苑英華謂公邃於風詩專俾編詩為一百八十卷端拱初由兵

部郎中拜左諫議出知許州入判史館加修撰兼判昭文館集賢院因次對上言
 方今取士多以文詞罕用經術望詔太學增博士員選通經專門之學擢以本官
 分教胄子用廣風化太宗深嘉納之謂輔臣曰楊某儒雅之士操履無玷寘之館
 殿得其宜矣元夕預召乾元樓觀燈上喜其老而不衰蓋有意於器使也公性方
 介疾非道以干進者每言溫寇用擊搏取貴仕使後輩務習趨競禮俗漸薄矣察
 斯言可以知其趨舍之所存也時樞密副使劉昌言翰林學士張洎錢若水皆不
 次進擢而右計使董儼方圖柄任嘗謂公曰上待二翰林甚厚旦夕且大用矣後
 公語直史館錢熙既而達於劉張二人指摘以為公構造飛語中傷近臣上聞而
 惡之不復問狀即日貶山南東道節度行軍司馬未行易鎮安遂陞王府方公之
 斥也年過七十矣自以為沒世不復用矣而人亦謂之老且廢也然而斥未數日
 而易近鎮又數月而登藩朝之選非上所隆遇而厚信者莫得而與焉而公出左
 官首當新命非夫文行業履之素茂豈能取信於人主非上之誠明待下不疑亦
 不能排衆毀而獨任卒所以護翼儲闈成令聞者由夫知臣之明而信道之篤也
 公初拜府僚自坡省至貳卿凡五命皆與故相畢文簡公同制而公位其上景德
 初真宗登用舊人畢公自兵部預政事踰月遂冠鉤罕而公以耆年先薨故不及